

# Dana \$2j bagi galak badan anjur kegiatan antara generasi

Oleh **NAZRI HADI SAPARIN**  
*mhadi@sph.com.sg*

SEBANYAK \$2 juta akan disediakan bagi menggalak badan-badan menjalankan program merangsang kegiatan antara generasi sepanjang dua tahun mendatang.

Dana itu diperuntukan oleh Majlis Usia Ketiga (C3A). Ini diumumkan Timbalan Perdana Menteri, Encik Wong Kan Seng, semasa merasmikan acara berjalan 1.5 kilometer sempena Hari Datuk dan Nenek di Taman Esplanade semalam.

C3A dibentuk pada Mei 2007 untuk menggalak kehidupan lebih aktif di kalangan warga tua dan mengenal pasti peluang pekerjaan, pembelajaran dan kerja relawan bagi mereka.

Ia mengendalikan dana 'Go Fund!' berjumlah \$20 juta bagi kegiatan-kegiatan warga emas. Dana \$2 juta itu adalah sebahagian daripada 'Go Fund!'.

Encik Wong, yang juga Menteri Ehwah Dalam Negeri, berkata masyarakat perlu berusaha bagi memastikan jurang antara generasi muda dan tua dapat dikurangkan.

"Jurang antara warga muda dan tua Singapura harus dikecil-

kan menerusi hubungan lebih mesra antara generasi. Ini bermakna mewujudkan peluang dan wadah bagi golongan muda dan tua beriadah dan berinteraksi," kata beliau.

Mengulas mengenai dana itu, pengerusi C3A, Encik Gerard Ee, berkata mesej mengingatkan warga Singapura tentang peri penting hubungan antara generasi dikesilkan perlu dipertingkatkan.

Beliau berkata warga berbeza generasi perlu belajar cara berkomunikasi secara berkesan, cara hidup bersama dengan aman damai dan cara mereka boleh bekerjasama.

"Sama ada dalam sebuah masyarakat, antara kawan atau di tempat kerja, terdapat generasi berbeza yang perlu belajar bekerjasama. \$2 juta ini ialah untuk dimanfaatkan projek-projek yang menjurus ke arah itu kerana hubungan antara generasi kini semakin penting," katanya.

Semua pertubuhan berpangkalan di Singapura dijemput mengemukakan idea bagi kegiatan antara generasi. Individu juga boleh memohon dana itu dan akan dipadankan dengan pertubuhan yang sesuai bagi menjalankan program mereka.



**TIDAK KETINGGALAN:** Kaum hawa juga turun padang dengan melakukan senaman di acara berjalan 1.5 kilometer sempena Hari Datuk dan Nenek di Taman Esplanade semalam. – Foto C3A